

**Angutit angajoqqaajusutut pinngitsaalillugit inissisimatinneqalinnginnissaat siunertaralugu inatsisitigut naartuersittoqartalernissaannik Inatsisartut isumaat pillugit oqallisissiatut siunnersuut.**

(Inatsisartunut ilaasortaqa Anna Wagenheim, Demokraatit).

**Akissuteqaat**

(Meeqqanut, Inuusuttunut, Ilaqutariinnut Peqqissutsimullu Naalakkersuisoq)

Angutit inatsisitigut naartuersittarnissaannut periarfissami pissuserissaarnikkut nalornineq pillugu pissanganartumik oqallinnissamik siunnersuut pillugu Anna Wangenheimimut qujanaq.

Meeqqamut angajoqqaanngorluni akisussaaffik annertuvoq – immaqqa inersimasutut akisussaaffik annerpaaq. Aamma meeqqamut angajoqqaajusunut akisussaaffik marlunnut avitaavoq. Najoraluaraanniluunniit najunngikkaluaraanniluunniit. Arnaq sapaatit akunneri 12-it qaangiutsinnagit naartuersinnissaminut pisinnaatitaaffeqarpoq, akerlianilli angut angajoqqaanngortussatut itigartitsinissaminut akuersinissaminulluunniit periarfissaqarani. Tamanna naligiissitaannginnertut isigineqarsinnaavoq, tassani arnaq angutip pisinnaanngisaatut pisinnaatitaaffeqarluni – allaat inuunermut allannguisuugaluartooq.

Nunarsuarmi nunami ataatsimiluunniit angutit inatsisitigut naartuersittarnissaannik suli atuuttussanngortitsisoqanngilaq. Imminut aperisariaqarpoq sooq taamaannersoq, tassami naligiissitaaneq maannakkut qitiutinneqartorujussuummat aamma qangaaniilli arnat angutillu inissisimanerannik immikkoortitsinerit atorunnaarsinniarneqarmata. Arnat taamaaliorinnaappata sooq angutit meerartaannginnissaannik periarfissinneqassanngillat?

Oqallinnerli assigiinngiaarneruvoq. Meeqqammi angajoqqaaminik, angajoqqaaminik kulturiminilli ilisimannittussaataitanaera? Meeqqamummi pitsaanerpaajusoq? Inatsisitigut naartuersinnissamut periarfissanik oqallinnermi angutit arnallu akornanni pissutsit kisiisa isiginiarsinnaanngilagut. Pineqartummi aamma eqqaamasariaqarpavut: meeqqat. Ataataqannginneq meeqqamut tarnikkut artorsaataasinnaavoq. Meerarpassuimmi inatsisitigut ataataqaratik peroriartorsimapput. Tamanna meeqqanut inuttut kingunerluttartorujussuusoq nalunngilarput. Aammali inuiaqatigiittut ineriartorsimavugut. Apeqqutaalerpoq kinguaariinnut nutaanut inatsisitigut ataataqanngitsunut taakkua tarnikkut aningaasaqarnikkullu kingunerluuteqarnermik nassataqartut, ammaassinissamik kissaateqarnerisugut?

Inatsisitigut naartuersittarnermut siunnersuut arnat angutillu akornanni naligiissitsinerulernissamik siunniussaqaarpoq. Taamaattorli piviusumik akerliatut nalilerneqarpoq.

Inatsisitigut naartuersinnermi suli meeraqassaaq inunngortussanik pilersorneqartussanillu. Kisimiilluni meeqqamik isumassuineq pilersuinerlu assoroornarsinnaasarpoq. Kia tamanna akilissavaa? Meeraq, anaanaasoq pisortallu.

Inatsisitigut naartuersinnissamut periarfissanut killiliussanik aalajangiinissamut ajornakusuulersinnaavoq.

Piffeqarsinnaavoq angut aallaqqaammut meerartaarnissaminik kissaateqartoq, naartunerulli nalaani isumaa allangorluni. Imaluunniit piffeqarsinnaavoq naartuersissinnaaneq periarfissaajunnaareertoq naartunermik paasisaqarneq. Naligiissitsinnginnermimmi nutaamik pilersitsissaaq arnap periarfissarisinnaanngisaatut angut meeqqamik qimarratiginnippat.

Nunatsinni meeqqat tamarmik inuunertik pitsaasumik toqqissisimanartumillu aallartissagaat Naalakkersuisut kissaatigaat. Tamannali taamaattuaannangilaq, tassa angajoqqaat marluummata. Pissuserissaarnissarli eqqarsaatigalugu killissaa sumiippa? Meeqqap ataataminit kissaatigineqanngitsup ataatami naluunnarnissaa pissuserissaarnikkut illersorneqarsinnaanerpaava?

Imaluunniit meeqqat tamarmik angajoqqaatik tamaasa nalunnginnissaannut pisinnaatitaaffeqarnerat aalajangiusimassallugu aamma angut meeraq pilliutigalugu akisussaaffimminik qimarratiginnissasoq pissuserissaarneq eqqarsaatigalugu imminut illersorsinnaava?

Oqallisigisassaq ilungersunartuuvoq taamaattumik Naalakkersuisut Inatsisartut oqallilluarnissaannik kissaappaat.